

LA CABERA XUNTA JEDI

MARTÍN GONZÁLEZ RODRÍGUEZ



**STAR
WARS**

www.martin-gonzalez.es

La cabera Xunta Jedi

Una hestoria de Star Wars

Martín González Rodríguez

www.martin-gonzalez.es

La cabera Xunta Jedi: una hestoria de Star Wars.

Martín González-Rodríguez, 2023.

Primer edición, Setiembre 2023.

Esta obra ye de baldre y talamente la pués descargar y compartir. La obra ta escrita col oxetu d'entretenimientu ente fans de Star Wars y ee nengún mou algámense beneficios con esti conteníu. Sicasí, si quiés una versión impreso y enllibrao d'esti documentu ties que pagar los gastos derivaos al editor.

Esta ye una hestoria fan de Star Wars. La propiedá intelectual del universu nel que desendólcase ye de Walt Disney Company, Lucasfilm Ltd. LLC y otros socios de Lucasfilm Licensing.

La hestoria y los personaxes d'esta obra ye idea orixinal de Clara Vidau González y de Martín González-Rodríguez © 2023.

ISBN:978-1-4467-7497-7

Fai enforma tiempu nuna galaxa llonxana, bien llonxana...

Rebelión

El maestru jedi Aric Tarek avanzaba pelos corredores del Templu Jedi mentanto los blasters de los soldaos resonaben detrás d'éli. Ensín que lo supiera, taba empecipiándo la Orde 66. Poro tolos Jedi habíen ser esaniciaos polos clones del exércitu de la República Galáctica. El templu taba arrodiáu poles tropes rebalbes qu'entamaron un asaltu despiadáu como parte d'un golpe d'Estáu ensin precedentes que'l so algame y magnitú entá yera imprevisible.

Metanes el tracamundiu reinante, Aric llogró axuntase con un grupo de supervivientes. Ente ellos taba'l so fiel ya indixebrable collaciu, el maestru jedi Gaius Dun. Dambos conociéronse'l mesmu día nel que foron llevaos al templu, siendo inda bien neños. De magar forxaron una amistá infrayable. Espoxigaron xuntos enfusándose nos misterios de la Orde Jedi de la mano de prestixosos maestros y tornaron en respetaos xenerales lluchando xuntos nes recién Guerres Clon.

El grupín abelugose nuna de les dependencies alministratives del templu asitiada na planta alta del edificiu. El so únicu accesu, la gran escalinata, quedó curiáu por Gaius, quien mandó construyir una pequeña barricada con restos de moblame. Ente los defensores atopábense un puñáu de mozos padawans y dellos miembros del Cuerpu de Serviciu Jedi.

El xeneral Gaius Dun yera un jedi atípicu. Magar que escarecía d'habilidaes destacables como piloto y que les sos mañes col sable de lluz yeren un tanto llindaes, tenía sicasí una conexión extraordinario cola Fuerzia, especialmente no tocante al control mental.

La so valentía y audacia prestu fixéronlu un líder prestixosu. Sobresalía nel lideralgu de comandos especiales d'asaltu y yera bien eficaz n'operaciones d'infiltración detrás de les llinies enemigues.

Yera célebre por inxeniar astutes táutiques que-y dexaron prindar importantes líderes enemigos y sabotiar con eficacia centros lóxicos y de comunicaciones.

Fervorosu siguidor de les enseñancies del maestru jedi Qui-Gon Jinn, Gaius Dun yera un gran estudiosu de la Fuerzia Vivo. Na so mocedá fixo un llargu viaxe iniciáticu pel planeta Dathomir, aú corre la voz que deprendió téuniques del Llau Escuro de la Fuerzia de manes de la Madre Talzin, una Hermana de la Nueche. Estos rumores foron reforzaos poles sos postreres llargues estancias nel misteriosu planeta Bardotaa. Ello ye que foi l'únicu jedi al que la reina Xulia dexó accesu al planeta tres l'escuru incidente Frangawl, nel que viéronse implicaos el maestru jedi Mace Windu y el representante del senáu Jar Jar Binks. Dízse que nes sos llargues temporaes nel planeta recuperó perantigues conocencies nel usu de la Fuerzia, desendolcando artes escures. Hai quien diz que Gaius emplegaba estos poderes pa lleer la mente de los prisioneros mientres la guerra.

Magar les sos innegables cualidaes, la so actitú griespo y rebalbo nun encaixaba bien cola rixidez del Código Jedi. Enfrentóse montonera de veces al Gran Conceyu Jedi y corría'l rumor de que les sos desavenencies col maestru Mace Windu yeren la razón pola que entá nun tenía algamáu un puestu de responsabilidá na Orde. Foi famosu'l so enérxicu discursu en defensa de les tesis del Conde Dooku de primeres de la guerra, onde puxo n'evidencia les contradicciones de los jedi. Estes aiciones ganaron-y numberoses enemistades ente los sos collacios, pero tamién espertaron un respetu especial ente aquellos que compartíen una visión más reformista de la Orde.

Colos pocos recursos con que cuntaba, Gaius amosó les sos habilidaes táutiques afitando un dispositivu de defensa afayadizu. Los pocos blasters que pudieron garrase de l'armería mientres la fase inicial del ataque foron dispuestos de forma eficiente, cruciando'l tiru al traviés de la gran escalinata. Los jedis más esperimentaos, ente los que taba'l mesmu Gaius, asitiáronse na primer llinia, aú refugaben los disparos de blaster enemigos colos sos sables de lluz. Cualesquier ataque fronteru yera un suicidiu dafechu y asina comprobáronlo los primeros clones que foron a tentálu, colos sos cuerpos atropaos a los pies de la escalinata. Mientres pudieren caltener el terrén altu, la so posición sería bien malo de tomar.

Sicasí había pocos motivos pa la esperanza. Bastante ye que los asaltantes yeren muchos, táben bien armaos y yeren veteranos con llarga esperiencia en combate forxada d'años de llucha nes Guerres Clon. El pequeñu destacamentu de supervivientes, ruinamente armáu, malpenes yera rival pa l'exércitu profesional subleváu. Amás, el tiempu xugaba na so contra. Escarecien d'agua y d'alimentos, lo mesmo que d'asistencia médico pa los mancaos. Nun podien permitir que'l cercu se allargara muncho nel tiempu. Yera necesariu atalantar un plan pa frayar el bloqueu lo primero posible.

Mientras Gaius dirixía la defensa, Aric Tarek intentaba comunicase con otros posibles núcleos de resistencia. Confiaba en pescudar qué taba pasando en Coruscant y n'otres zones del templu pa saber con qué fuercies cuntaben pa entamar un contraataque.

El xeneral Aric Tarek tenía fama como brillosu estratega militar. Yera reconocíu pola so gran habilidá pa analizar situaciones complexes nel campu de batalla y desendolcar estratexes innovadores capaces d'esplotar conducentemente les debilidaes del enemigu. Combinando'l so enfoque metódicu con grandes dosis d'audacia, avezaba tomar decisiones ventureres y executar maniobres inverosímiles que, cuasi siempres, finaben con éxitu.

La so llealtá pa cola Orde jedi yera indiscutible y la so amistá personal col prestixosu maestru jedi Ki-Adi-Mundi ganára-y una notable influencia nel Alto Conceyu Jedi. Muchos taben convencíos que cuando remataren les Guerres Clon, Aric ocuparía un cargo cimero na xerarquía jedi.

A pesar de les sos diferencies, la amistá d'Aric y Gaius yera indixebrable. A lo llargo de los años depredieron a respetar les fortaleces de cada ún. Ente que Gaius almiraba l'audacia y la visión estratéxica d'Aric, esti valoraba la serenidá y la sabiduría de Gaius. Metanes d'una galaxa sopelexada pola guerra, los dos collacios atoparon una manera única de axuntar les sos habilidaes y formar un dúo de xenerales tarrecible. El so trabayu n'equipo y la combinación de les sos mañes dexáron-yos superar les torgues y algamar importantes victories n'incontables ocasiones. Dambos sabien qu'el so verdaderu poder moraba na xuntaza de les sos habilidaes.

La situación pal grupu entamó a tornarse tarrecible cuando Aric camentó que les comunicaciones col exterior del templu Jedi taben frayaes. Nun podien recibir ayuda del exterior nin comunicar la

situación na que s'atopaben. La eficacia y profesionalidá de los troopers yera bien conocía y taba claru qu'una de les sos primeres decisiones foi la instalación de disruptores pa controlar les tresmisiones, aisllando l'edificiu electrónicamente.

Ensin ayuda exterior, les esperances de supervivencia esguliaben adules a midida que zarriaba'l cercu. La gran escalinata yera la so única salida posible. Caltener el control d'esi corredor de la muerte yera vital pa la so supervivencia y van defendelo palmo a palmo. Atalantaben que mentanto durase la llucha, afitaríen numberoses tropes enemigos nel cercu. Esos troopers nun tendríen llibertá pa atacar otres posiciones o pa facer frente a les tropes lleales a la República que, de xuru, taríen lluchando escontra los insurxentes per Coruscant y quiciabes tamién n'otros planetas. Los dos xenerales confiaben qu'el so sacrificiu nun sería en devanáu.

Aric emplegó'l so potente comunicador holográficu Hush-98 pa contactar con Maya Raythorne, la so moza padawan, que sabía taba nel templu. Magar que nun tuvo rempuesta, el so comunicador taba encesu, lo qu'amosaba que dalgún mou entá taba dientro del templu. Intentólo de siguió con Kira Lesh, la padawan de Gaius, cuyo comunicador nin siquier paecía tar operativu. Esto nun yera una bona señal.

El maestru siguió contactando con dellos jedi que atalantaba aínda atopábense acantonaos en Coruscant. Poro podíen tar nel templu. Intentó falar con Mace Windu, Kit Fisto y Minas Velti. Llamentable foi que nengún d'ellos rempondió a los sos desesperaos llamaos. Y lo que yera peor, los sos comunicadores holográficos paecíen nun tar encesos. A cencielles nun respondíen a les señales unviaes. Confiaba que los jedi s'atoparen fora del templu. De lo contrario l'ausencia de señal nos sos comunicadores solo podría significar que yeran prisioneros. O peor entá, taben liquidaos.

Aric recordó ver a Anakin Skywalker nel templu esi mesmu día n'algún momentu enantes qu'empecipiase l'asaltu. Nun sabía si llograra abandonalo enantes de la rebelión asina qu'intentó comunicase con elli al momentu. Magar nun respondía a los sos llamaos, atalantaba que al igual que nel casu de Maya, el so comunicador atopábase encesu. Eso quería dicir que Anakin taba nel templu. Si llograben contactar con elli, contaríen con un poderosu aliáu pa repeler la fuercia agresora.

De sópitu, el xeneral atalantó que toles tropes a les que s'enfrentara dende l'entamu de la crisis pertenecíen a destacamentos de la Llexón 501. Esti yera precisamente'l cuerpu d'élite mandáu por Anakin Skywalker. Yera bien probable que nesos momentos Anakin tuviere presu de los sos soldaos. Esto nel meyor de los casos. Pero, ¿y el canceller Palpatine? ¿Siguiría al mando de la República? ¿Taría prindáu polos rebalbos? ¿Quién taría al mandu de la 501 agora? ¿El capitán Rex? Paecía improbable. Al xeneral resultába-y inconcebible que soldaos tan lleales y nobles pudieren actuar por cuenta propia nun actu de desobediencia d'esa magnitú. Ello ye que foron diseñaos xenéticamente pa obedecer. Necesariamente tenía que haber daquién ayenu al exércitu de clones implicáu nel golpe d'Estaú. Daquién bien influyente. Daquién miembru del senáu, ensin dubia. Nun cabía refugar una trama separatista detrás d'esto. Atalantó que la Orde tendría enforma trabayu pa desentrañar l'algame de la combalechadura una vegada finara la rebelión.

Pero pel momentu tocaba centrarse nel equí y agora. Cada minutu cuntaba.

Atayáu, Aric levantó la vista del so comunicador y miró pal so collaciú Gaius. Al xeneral abultó-y qu'un estrañu silenciu medraba pela redolada. Magar que entá sentíen dalgunos disparos alloñaos, aquella parte del templu taba silenciosa y relativamente sele. La gran escalinata taba estenada y los clones dexaren d'atacar. Por esperiencia sabía qu'aquello nun yera bono. Los enemigos preparaben daqué y la sorpresa diba ser, ensin dubia, bien desagradable. Magar que tenía un mal presentimientu, decidió que yera'l momentu d'entrar n'acción.

—Tengo bien bones noticies pa ti, Gaius —dixo Aric—. Nengún jedi respuende. Naide va venir a ayudar.

—¿Y eso son bones noticies? —entrugó Gaius.

—Son bones porque ye que vamos tener de salir d'equí polos nuestos medios, como nos vieyos bonos tiempos.

—¿Qué ye, que tienes un plan? —retrucó Gaius.

—Sabes que siempres entamo daqué —sorrió Aric—. Podemos aportar pal pisu baxo por sorpresa y movenos pelos corredores de serviciu esteriore. Con un pocu de suerte, vamos aportar a la Gran Sala ceremonial, l'únicu llugar peligroso nel que quiciabes tengamos griesca p'abrir camín. Si llogramos crucial la sala, colaremos

discretamente pa la sección de talleres. Como ye una zona pal usu de droides, va tar bien pocu xixilada. Ellí vamos poder garrar dalgún vehículu pa escapar.

—Un plan suicida, como siempre —retrucó Gaius de forma sarcástica—. Préstame. Los tos delirios cuasi siempre finen bien pero... ¿cómo vamos aportar pal pisu baxo si la escalinata ta bloquiada?

Aric sonrió. Prendió el so sable de lluz y fixo el degomán de trazar un círculu nel suelu con elli. Aquería aprovechar la gran potencia del sable pa facer un furacu nel suelo per onde afuxir.

—Cuando aportemos a los talleres vamos tener que garrar dalgún tresporte civil —siguió Aric—. La nuesa única oportunidá pa sobrevivir va ser afuxir escontra'l centru de Coruscant y axuntanos ente la xente. Esta nueche ye imposible dexar el planeta. Seríamos blancu bien fácil pa los cazas Z-95 rebalbos.

—Por eso nun te esmolezas —dixo Gaius—. Conozo dellos tipos poco recomendables nos niveles inferiores de la ciudá que debenme favores. Contrabandistes y traficantes que saben despintase perbien. Pueden escondenos hasta que pase la torbonada.

—Excelente —contestó Aric—. Ellí, debemos ser cautos y evitar llamar l'atención. Si nos movemos con discreción podremos safar a nuegos perseguidores. Siquier hasta que resulte facederu colar del planeta.

De sópito, un fuerte chasquíu punxo fin a la conversación. La pantalla holográfica de Aric activóse y una figura lluchó por apaecer al traviés de les múltiples interferencies que deformaben la señal. A lo último, la semeya llogró estabilizase lo suficiente pa ser reconocible. Amosaba una moza twi'lek con un sable de lluz. Yera Maya Raythorne, la padawan de Aric.

—¡Tas viva! —esclamó Aric—. ¡Intenté contautar contigo munchísimes vegaes! ¿Aú tas?

—Toi nel aula principal xunto a los younglings, maestru. Tamos siendo atacaos por un escuadrón de la Lexón 501. Necesitamos ayuda urxente. Nun podremos resistir muncho tiempu.

—¿Kira ta contigo? —entrugó Gaius interrumpiendo la conversación.

—Sí, maestru Dun. La so padawan ta con nós, pero ta mui grave. Ta lluchando pa caltener la consciencia. Treslladámosla pal aula de meditación xunto colos younglings supervivientes.

—Entendíu —afirmó Aric con preocupación—. Vamos entamar un plan d'escape colando pa la Gran Sala ceremonial. Eso ta bien cerca de la vuesa posición. Si nun lo escaezo, ellí hai un pequeñu corredor de serviciu que conecta coles aules. ¿Hai vía llibre hasta la sala?

—Negativo. Tamos arrodiaos dafechu —retrucó-y la so padawan—. Los clones ataquen tamién dende esi corredor, pero ye bien estrechu y resulta fácil contenenelos ellí.

—Entós debemos entainar bien ceo —dixo Aric—. Al aportar a la Gran Sala atacaremos a los clones pela espalda y asina contautaremos col vuesu grupu.

—Por favor, dir con cuidáu —replicó Maya.

Nesi momentu, una gran nube de polvo cubrió a Maya dafechamente. Les comunicaciones, yá mui frayaes, finaron sópitamente y l'holograma desapareció.

Pero nun hubo tiempu pa llamentos. Una serie de gruñíos metálicos carauterísticos provenientes de la gran escalinata provocó qu'absolutamente toos xiraren la cabeza na mesma direición. A midida que'l soníu amontábase, la tensión foi n'aumentu, especialmente ente los valientes apostaos na barricada.

—Si ye lo que atalanto, tarrezu que vamos tener que atrasar el plan de rescate —dixo Gaius.

—¡Un executor tácticu! —glayó Aric—. Tienen que tar desesperaos pa meter n'AT-TE dientro del templu. Vienen a por toes.

Efeutivamente, les pisaes del caminante fixéronse sentir cada vez más próximes hasta que la so figura apaeció de secute nel campu de visión de la escalinata. El robustu vehículu tenía una apariencia intimidante. Alzándose sobro les sos seis pates articulaes que dexaben al pilotu movese percima de los escombros espardíos per dayures, frutu de les detonaciones y baltaderes practicaes polos soldaos d'asaltu. Nel so parte fronteru cuntaba con un cañón láser pesao dispuesto pa disparar poderosos rayos d'enerxía.

La tarrecible visión del AT-TE maniobrando pa tomar una posición de combate ventaxosa causó verdadero terror ente los defensores. Dalgunos d'ellos refundiaron los sos blasters pol suelu y recularon hasta'l fondu de la Gran Sala. Gaius y Aric rompieron la tensión del momentu debuxando una sonrisa irónica nos sos llabios. Enfrentárense en numberoses ocasiones a blindaos enemigos y

sabíen que maniobrar estos vehículos ente edificaciones facíalos bien vulnerables. En combate, la experiencia supera tou.

Aric apurrió la so manzorga en direición a ún de los blasters que s'atopaben nel suelu. Emplegó la Fuerzia pa facer que'l arma volara escontra d'elli, suxetándola con decisión. Con actitú resuelta, púnxose detrás del parapetu y apuntó con procuru na direición del blindáu.

L'enorme vehículu alliniárase precisamente cola escalinata, asitiándose nun puestu de tiro afayadizu. Atopábase levantando'l cañón pa que'l disparu del blaster cruciara al llargor del corredor escontra la planta superior, onde l'impautu podría finarlos a toos. L'artilleru taba programando'l vehículu pa obtener una solución de disparu. La españida yera inminente.

Pero esta nun se produció. La posición frontera na que s'asitiaba'l vehículu ufiertaba un blancu bien amenorgáu pero algamadizu pa un bon tirador. Aric nun desperdició la oportunidá que se-y presentaba y el quarren fixo dos disparos en bien curtiu espaciu de tiempu algamando al conductor y al artilleru. L'AT-TE quedó deshabilitáu en segundos gracies a l'habilidad del jedi.

—¡Los blasters son armes poco civilizaes! —dixo Gaius con sorna—. Vas decepcionar al maestru Obi-Wan cuando s'entere de lo que fixisti.

—Mientras déxenos esanicar enemigos a esa distancia, bienveníes sían —retrucó Aric con un visax—. Cada vegada qu'intenten camudar al artilleru van cuntar una nueva baxa. Va ser como una galería de tiru.

Perfeutu —dixo Gaius—. Cuando lo intenten otra vegada voi facer una salida de diversión pela escalinata. Voi solo. Van tar tan sosprendíos de veme que malapenes van poder reaicionar. Mientras los distrajo, tenéis d'aprovechar pa escapar según el plan. Voi cubrir la retirada y vamos axuntanos na Gran Sala.

—Paéz suicida pero siquier vamos tener una oportunidá. Cuídate vieyu amigo. ¡Que la Fuerzia te acompañe! —concluyó Aric.

Nese intre, un segundu AT-TE apaeció n'escena. Pero nesta ocasión los tripulantes tomaron nota de lo asocedió col so predecesor. En llugar de poner a tiro les cabines del pilotu y del artilleru, el blindáu maniobró fuera del campu de visión de Aric pa asomar namái l'extremu del poderosu cañón. Agora, l'arma apuntaba diagonalmente escontra d'un oxetivu asitiáu na planta inferior, xusto

baxo la posición qu'ocupaben los resistentes. El vehículu paróse con un xiríu, y toos sintieron l'entamu del procesu de carga de los rayos d'enerxía.

—¿Qué faen? —entrugó Gaius—. Dende esa posición nun van poder acertarnos.

De sópitu, Aric albidró en tol so alcuertu lo que taba asocediendo.

¡Tol mundu a cubiertu! —glayó Aric—. ¡Aprieta! ¡Van disparar a les columnes de sustentación del pisu embaxo! ¡Van baltar esta planta del edificiu!

Pero l'avisu aportó demasiáu tarde. L'andanada garró a los defensores por sorpresa. La enorme española fixo respingar too'l edificiu. El suelu fundió baxo los pies de los jedi y una enorme bola de lluz y calor envolumbrosos dafechu.

El Códigu

El jedi posaba inerte nel suelo envuelto nun cobertor de povisa que flotaba nel aire. L'onda expansiva de la tremenda española y l'esbarrumbe del suelo dexáronlu inconsciente y vulnerable metanes la destrucción.

A midida que recuperaba la consciencia, sintió un fuerte pesu sobro'l so pechu, como si un xigante invisible lu entartallara amodo. El so esnalíu yera entrecorto y afogadizo, enzancao pola espesa capa de povisa qu'enllenaba l'aire y peñerábase pelos sos pulmones. Los sos párpados pesaben como una aleación de neuranio, pero lluchaba por abrir los güeyos deseyando ver qué asocediera.

Esforcióse por move-se, sintiendo cada músculu protestar n'agonía. La so mente, inda nun estáu de tracamundiu, lluchaba por entender la magnitú de la traxedia que lo arrodia-ba. La so toma de consciencia foi cobrando forma adúlces, como les pieces d'un rompecabeces que axúntense amodo.

Con fuercia renovao y un sentíu de propó-situ, impulsóse p'alantre, lliberándose de los escombros que lu taben torgando. El dolor que sintió foi inmensu. Tenía quemadures y desgarrones per tol so cuerpu. Nada que una nueche nun tanque de bacta nun pudiera iguar, pero'l so brazu izquierdu taba bien mal y ensin dulda riquía cristales de Fueu Sanadores. Colgába-y de forma quexumosa y de

xuru taba frayáu en dellos sitios. El dolor yera insoportable y tuvo que facer usu de tol so poder mental jedi pa inoralu.

A lo último, Gaius Dun levantóse.

Debíu a lo tarrecible del ataque, tola zona taba a escures. Les solombres que lu envolubraben convirtiéronse nun símbolu murníu de la situación na que s'atopaba. Nun solo yera una escuridá física, sinón tamién una escuridá emocional qu'amenaciaba con acorvialo.

Demientres avanzaba ente los restos del edificiu esmarranáu, tuvo que prender el so sable de lluz p'allumar el camín. Yera una suerte qu'entá cuntara con elli y entá más raru, qu'inda furrulase.

Tou al so alrededor yera una escena tarrecible. La zona foi amenorgada nun montón d'escombros y ruines. Les muries taben esmarranaés, les estructures taben desmoronaes y el techu colapsara nuna nube de povisa mortal.

La visión de cuerpos inmóviles espertó nél un sentimientu de fondera tristura y esperecimentu. Los sos collacios, que dalguna vegada compartieron la so misión y propósitu, agora taben somorguiaos nun mar de muerte y destrucción. Per un llargu periodu de tiempu tuvo a la gueta ensin ésitu del cuerpu del so amigu Aric Tarek. Entrugábase cómo ye que elli entá siguía vivo.

Taba claro que los clones diéronlo por muertu y que la Fuerzia trató-y con bien de respetu.

El silenciu absoluto y l'ausencia de troopers pela zona indicaben que yera bien probable que la griesca y la resistencia finara dafechu. Yera'l momentu aparente pa tentar de colar del templu ensin ser vistu.

Pero enantes tenía que rescatar a les sos padawans.

Taramellándose y tosiendo aóirtó a la entrada d'acceso de ún de los corredores llaterales del templu. Enantes d'enfusase nél, xiró y dió una última güeyada al montón d'escombriu. Despidióse mentalmente del so amigu Aric. De xuru que'l quarren yera yá ún cola Fuerzia. El jedi nun pudo torgar que los sos güeyos amugárense.

Movióse en silenciu pel corredor evitando como pudo los escombros que lo ocupaben. Tamién tuvo qu'arrodia dellos cuerpos que taben al llargor de la vía. Jedis y soldaos entemeciense. La llucha tuvo de ser bien intensa ellí.

El maestru sabía que la tensión del momentu podía ñublar el so pensamientu y lleva-y a tomar males decisiones nun momentu críticu. Decidió centrar la so mente nel presente al traviés de la

meditación de los cinco puntos esenciales del Códigu Jedi. Recitar el mantra milenariu nel contestu d'una batalla yera una efectiva téunica de meditación que-y deprendió el so maestru fai yá enforma tiempu, cuando inda yera un guah.e. Siempre-y tuvo estimáu por ello pos-y foi de gran ayuda pa resolver con ésitu situaciones bien delicades mientres les Guerres Clon.

—Puntu 1: Nun hai emoción, hai paz—

Al cruciar una esquina acolumbró un par de soldaos clon que facíen guardia a la fin del corredor. Ellos tamién notaron la so presencia y diéron-y la bienvenida con una serie de disparos bien afayadizos. Bloquiólos con dificultá col so sable de lluz atalantando que con una sola mano resultaría-y bien difícil reflexalos escontra los sos atacantes. El pasu taba zarráu.

El jedi decidió entós emplegar una téunica que desendolcara xuntu con Aric Tarek nel recién asediu de Saleucami. El trucu resultó-yos bien afayadizu pa avanzar pelos estrechos túneles d'accesu al xenerador d'escudos perimetrales de la ciudá. Apagó el so sable y aventólo con fuerza escontra los clones espurriendo'l so brazu sanu pa trás, pa garrar impulsu. La empuñadura del sable viaxó en llinia recta por metá del pasiellu en direcció a los soldaos, que dexaron de disparar ablucáu. Controlando la trayectoria cola mente, fixo que'l sable xirara sobro sigo mesmu a gran velocidá. Nel momentu xustu nel que diba pasar ente los soldaos, el jedi prendió'l sable exerciendo presión mental sobro'l botón. El rayu de lluz actuó como una gadaña, partiendo a los troopers pela metá.

—Espero que-yos preste el regalu d'Aric— espetó Gaius al pasar ente los dos cuerpos, mientres cola so mente atraía la empuñadura del sable pa la so mano.

Crució la puerta que custodiaben los troopers aportando al salón de los Archivos Jedi. Ellí atopó una escena tarrecible. Les estanteríes taben entornáu, los holocrón, contenedores de sabiduría jedi, taben frayaos y espardíos pela redolada. El fueu amburaba en delles zones y amenaciaba con finar coles poques estanteríes qu'entá s'atopaben intautes. Col soníu llonxanu de les voces de los clones haciendo resonancia nes sos oreyes, Gaius enfusábase nes zones más fonderes de la gran instalación bibliotecaria. A medida que avanzaba,

contemplaba ablucáu cómo les estanteríes carbonizaes banciábense y esmoronábanse, refundiando povisa y escombros per dayures. Les reliquies y los artefactos de la biblioteca frayábense al cayer al suelu, amestando un soníu d'estrueldu al caos xeneral.

Nun atopó cuerpu dalgunu nel Archivu Jedi. Rescamlaba qu'ellí nun hubo griesca. Sólo destrucción. Los faltosos vinieron pa finar la cultura, pa desfacer la herencia de conocencia jedi acumulada mientres xeneraciones. Un mileniu d'hestoria foi esborriáu. La victoria d'aquelles besties esparciría una escura solombra sobre la República. La diversidá cultural de los sos planetas y la llibertá seríen acutáes. De xuru triunfaría la discriminación y la esclusión. Pero esto nun yera namái que l'empiezu —atalantó'l xeneral—. Aú quemen llibros, quemen persones.

Con enfadu, Gaius coló del archivu al traviés d'un de los conductos del teyáu, nos que s'atopaben los sistemas de ventilación y comunicación. Conocía perbien los llaberintos de corredores apináos de cables que percorríen bona parte del templu. Cuando yera un guah.e, usábalos con avezu pa escondese de los castigos o como accesu secretu pa infiltrase nes aules cuando aportaba tarde a clas. Munches vegaes usábalos n'otru sen, pa dexar les lliciones que-y abultaben aburries y abelugase nel Archivu Jedi. Ellí cuntaba col espaldu y la complicidá de la Maestra Archivista Xocasta Nu, quien aguiyaba'l so interés apurriendo-y ensame de holocrones apinaos de conocencia. Foi d'esta mente como, de llombu de los sos maestrus, entamó aniciase nos secretos de la Fuercia Vivo y conoció'l misteriosu cultu Frangawl, cuyu estudiu diba ser la so pasión al llargor de la so vida.

—Puntu 2: Nun hai inorancia, hai conocencia—

Recordó con ciñu a Xocasta Nu y entrugóse cuál sería'l so destín. Conociendo la profesionalidá de la Maestra Archivista, de xuru qu'al entamu de la insurrección taría trabayando nel gran archivu. Sabía que de tar nel so puestu, Xocasta Nu enxamás permitiría aquella destrucción. Nun habiendo cuerpos na zona, cuidó que la venerable jedi podría a lo meyor escapar a tiempu, magar que la so esperiencia dicía-y que lo más probable yera que la maestra fora axusticiada fora del recintu. Los sos güeyos volvieron amugase, pero esta vegada nun pudieron caltener unes llárimas que-y esnidaron amodo pela barba.

Arrastróse penosamente pelos estrechos corredores nuna travesía que se-y fixo eterna. A lo último aportó a una amplia recámara na qu'había una rexa con un pequenü furacu de salida. Si la so memoria nun fallaba, la abertura tendría de tar práuticamente enriba del aula de meditación. Esa foi la cabera posición comunicada por Maya.

Baltió la rexa de la abertura d'una patada coles sos fuertes botes de cuero. Trevesó'l pequenü furacu colos sos pies per delante ximiendo de dolor al cutir les sos quemadures y mancadures cola abertura. Quedó colgáu un intre de la abertura enantes de cayer rodando pel suelu pa amortiguar l'impautu.

Darreú incorporóse adúlces nuna pequeña habitación esllumada namái pola tenebrosa lluz de les llapaes que se dexaben entever per les ventanes. Comprobó que s'atopaba nuna de les aules d'entrenamientu de los younglings, los rapacinos aprendices de jedi qu'entá nun teníen asignáu un maestru. Al mirar al so alrededor atopó con una escena tarrecible. El moblame de l'estancia taba entornáu y desfecho, evidencia de les engarradielles que tuvieren llugar ellí. El suelu taba cubiertu de llurdios escuros. Cuerpos xacien espardíos per dayures. Dellos taben baltaos pámpana arriba colos güeyos zarraós y espresión de dolor nes sos cares. Otros reposaben en posiciones esmurriaes y antinaturales. Gaius Dun quedó espantáu al ver aquellos neños, identificando a muchos d'ellos como los sos escolinos. Tamién pudo reconocer a los padawans de dellos conocíos caballeros jedi. Incluse estremó a dellos mozos caballeros que recibieron el grau enantes de lo que yera d'avezu, por mor de les imperioses necesidaes de la guerra. Concluyó que nes sales d'enseñanza tuvo llugar el caberu actu del asaltu al templu. Ellí dexaron la so vida les caberes xeneraciones jedi. El futuru de la Orde taba práuticamente aniquiláu.

De sópitu, un dolor intensu nubló-y la mente. Taba acabantes d'afayar la figura de la so moza padawan ente los cuerpos que s'espardien pela habitación. La pequeña Kira Lesh taba pámpana arriba nel suelu. Un poco más llueñe, colombró tamién l'inconfundible cuerpu de Maya Raythorne, la padawan twi'lek d'Aric. El jedi fixo un esfuerciu pergrande pa controlar les sos emociones, lo que malapenes algamó. Resultó-y bien difícil estremar de la so mente la solombra d'un intensu odio perturbador, claru preludiu del Llau Escuru.

Afaráu, echóse xuntu al cuerpu de Kira y recostó con munchu curiáu la cabeza de la moza rodiana ente les sos zanques, afalagando con munchu ciñu la verde frente de la so padawan. Ensin poder evitalo, la so mente vióse sópitamente envolubrada pola tarrecible semeya del immediatu pasáu de la rapaza. Na so visión, la padawan lluchaba heróicamente defendiendo col so sable de lluz la vida d'un grupín de younglings qu'arremolinábanse detrás d'ella, asorayaos col miéu emborrinando les sos mentes. Al traviés de los güeyos de Kira pudo acolumbrar con plasmu como d'ente los asaltantes surdía un siniestru personaxe cola cara oculta, portando un sable de lluz encesu.

El dominiu de la Fuerzia Vivo, la enerxía de toles coses que vivieron, ye un poder que bien pocos jedi teníen y que'l so control y maestría requier de toa una vida d'estudiu y dedicación. Gaius Dun tenía ensin dulda una sensibilidá especial que nengún jedi algamó enxamás, lo que-y ganara'l respetu y medrana de los sos collacios. El so dominiu del Tai Vordrax, la téunica pa garrar esperiencies del pasáu al traviés de la Fuerzia presente nos oxetos yera tan intenso n'elli, que n'ocasiones yera capaz de agüeyar el pasáu ensin lo intentar. Pa munchos de los sos collacios, tratábase d'un arte oculto, bien próximu al Llau Escuru de la Fuerzia. Ello ye que el Conceyu Jedi desaconseyó precisamente'l so empléu en persones finaes, cuidao que les emociones enantes duna muerte xabaz son tan intenses que la persona muerta quiciabes tendría dalgún contautu col Llau Escuru, abasnando a quien s'atreviere a güeyales.

Magar el peligrosu bien grande que representaba, revelar la identidá de la tarrecible figura al traviés de la psicometría yera quiciabes ésta la única oportunidá que-y quedaba a Gaius pa pescudar por qué'l so mundiu tornárase dafechu al aviesu. La información algamada podría ser bien importante pa tratar de salvar lo que quedaba de la Orde Jedi.

Emplegando l'imprescindible contautu físicu cola so padawan, Gaius entró en comunión colos restos de la Fuerzia Vivo qu'entá permanecíen nel cuerpu de Kira empecipiando un procesu de meditación que lu punxo en trance. Darréu, la so mente enllenóse de visiones que-y amosaron el drama de los caberos momentos de Kira. Al traviés de los güeyos de la rapaza pudo over la llegada na sala d'un grupu de clones lideraos pela figura escura. Vió como éstos executaron la matanza ensin rastru dalgunu de piedá nin d'emoición.

La visión amosó a la moza Maya protexendo a Kira hasta'l final, dando la so vida pa salvar los últimos neños supervivientes. Pudo sentir al traviés del cuerpu de la so padawan como ésta taba nel suelu gravemente mancada y desarmada. Clamiaba piedá.

Contemplu con miéu como'l tenebrosu personaxe llantóse énte Kira, afayando la so cara énte ella. El so rostru tornose llímpi, desaposiándose dafechu del halo d'escuridá que lo arrodiaba. Pa la so sorpresa, la figura amosóse como'l caballeru jedi Anakin Skywalker.

Yera l'Escoyíu.

Espantáu, Gaius Dun vió como Anakin aniquilaba los últimos guah.es supervivientes pa dempués executar tamién a la so padawan travesándola adulces y con crueldad col so sable de lluz.

El maestru salió de la trance cola so mente borrinosa dafechu. Anakin Skywalker, el héroe de la República traicionara a los jedi y lideraba la matanza de mozos inocentes. Guiaba les tropes clon a la total destrucción de la Orde Jedi. Yera el cabezaleru de la insurreición. Yera la Llexón 501, les sos tropes escoyíes, la qu'actuaba como'l so puñu executor.

Dafechu azotáu pol esfuerzu mental, Gaius rindióse a la vera del cuerpu de la so moza padawan. De normal, l'empléu del Tai Vordrax riquía d'una concentración mental bien intensa, especialmente cuando s'emplegaba sobro seres muertos o cuando viaxábase bien atras nel tiempu. La so mente yera agora un torbolín de pensamientos y emociones apolmonantes enxareyaos en sentimientos de murnia fonda, esperecimientu y decepción. Tantul' so cuerpu como la so mente quedaren mancaos por aquella experiencia. Conociendo la gravedá de la situación, tornó a la meditación pa reestablecer el so equilibriu.

—Puntu 3: Nun hai caos, hai harmonía—

Mientras se recuperaba amodo, atalantó que quedaben poques esperancies de supervivencia pa la Orde Jedi. Precisaba contactar bien ceo colos miembros supervivientes del Conceyu Jedi con cuenta d'entamar la defensa y neutralizar la rebelión liderada por Skywalker. Por fortuna, bien d'ellos atopábase llueñe de Coruscant, participando en delles misiones pa liquidar los caberos apartaces separatistes y finar la guerra. Eso dexábalos fora del focu d'Anakin.

De xuru podrían entamar una contraofensiva xeneral sobro Coruscant al mando de les tropes lleales destacaes pela galaxa.

Sabía con certidume que la so amiga Depa Billalba y el poderosu Plo Koon taben en misiones fuera del planeta. Gaius tenía d'abandonar el templu asina pudiera y comunica-yos lo asocedió dende un llugar seguru. Apuraba avisa-yos de quién taba al mandu de la insurrección pa que nun cayeren na trampa de Skywalker. Dempués tentaría de entamar la resistencia na capital de la República. Quiciabes pudiera contautar cola maestra Shaak Ti y otros jedís supervivientes que entá taben en Coruscant pa centrar la defensa alrodiu del canceller Palpatine. Cuidaba que'l líder de la República nun tuviera prindáu por cuenta de Anakin. Seique, entá caltuviera'l poder escondíu en dalgún llugar del planeta. En conciencia, el tiempu corría a favor del traidor y había que neutralizalo bien rápido.

Entá bien debilitáu pol esfuerciu realizáu, incorporóse amodo y dirixiose caedizu escontra la puerta de l'aula. L'habitación taba bien cerca de la Gran Sala ceremonial y de xuru podría llegar a ella ensin ser visto usando'l corredor de serviciu. Enantes de colar del aula, dirixió los sos güeyos pa contemplar per última vegada a la so querida padawan Kira Lesh. Xuró pola so memoria y la de tolos jedís que morrieron n'aquel tarrecible día facer tou lo que tuviera na so mano pa salvar la Orde y restablecer l'equilibriu.

Avanzó apurriáu pol llargo corredor de serviciu, sofítándose de xemes en cuando na paré. El trayeutu fíxose-y bien penosu al tener que arrodiar constantemente los cuerpos que taben per dayures. Tal como dixera Maya, la batalla foi bien intensa nesi frente. Magar que taba azotáu, recuperábase rápido. Sicasí, el dolor de les sos feries nublába-y la mente, especialmente'l tarrecible estáu del so brazu esquierdu. Parose a medio camín y abrió con dificultá una de les cartucheres del so cinchu. D'ellí sacó un comunicador personal col que estableció contautu col so droide astromecánico emplegando una tresmisión codificao.

—Escucha con atención M1X-4, preciso que prepares el mi caza Delta-7 pa una misión bien importante —ordenó Gaius—. Cuasique somos la última esperanza de la Orde Jedi y tenemos de colar darréu pal planeta Stewjon y axuntarnos de callao cola maestra Selene.

L'astromecánicu confirmó la orde dende los talleres asitiaos xusto debaxo de la Gran Sala ceremonial. Desplegando les sos ruedes,

dirixióse rápido pal interceptor llixeru clase Aethersprite de Gaius Dun.

Sicasí, Gaius recordó la sabia reflexón que fixo'l so amigu Aric Tarek y camudó sópitamente de parecer.

—Escaez lo que díxi Mix-four —ordenó Gaius—. L'espaciu aéreu de Coruscant tien de tar cuantayá en manos de la 501. Volar fuera del planeta nesti momentu ye una misión suicida.

M1X-4 confirmó la contraorden ente pitidos.

—Asina ye Mix-four —esclarió Gaius— Anakin ta detrás de la rebelión. Escucha con atención. Quiero que subas al aerodeslizador de Aric Tarek y lo llesves a la entrada de los talleres, la que ta xusto debaxo de les ventanes de la Gran Sala ceremonial. Espera ellí y prepárate pa colar rápido pa los niveles inferiores del planeta. Si daquién entruiga, dices-y que tas esperando a un personaxe perimportante pa llevalo a cenar.

Na xiriga del exércitu republicano, *llevar a daquién a cenar* significaba treslladar a un prisioneru al centru d'interrogatorios. Gaius atalantó qu'esa frase nun levaría barruntos ente los clones. Tampoco lo sería usar el speeder RGC-16 de Aric. El so amigu taba arguyosu del so vehículu pero en realidá yera un trastu bien vulgar. Los troopers baxo'l so mandu desaposiaren munchos vehículos similares mientres la guerra, asina que atalantó que nun-yos resultaría raru qu'otru los emplegara nel tresporte de prisioneros. Amás, un vehículu tan corriente llevaría pocos barruntos circulando polos niveles inferiores de Coruscant. Dar prestao'l so queríu vehículu, sería un serviciu póstumu del so amigu Aric.

El jedi siguió'l so camín y en terminando de traviesar el corredor, entró na Gran Sala con muncho procuru. Yera un espaciu pergrande dafechu llibre de moblame, de planta octogonal coronáu por una cúpula de cristal y arrodiáu d'amplios ventanales. Aquella magnífica instalación usábase pa la celebración de grandes ceremonies transcendentales y ritos de pasu.

Pal so aliviu, la sala atopábase dafechu valera. Sacante los cuerpos d'un bon númberu de soldaos y jedis que taben inmóviles nel suelu. Les muries, enantes impecables, amosaben agora marques de disparos, testigos mudus del enfrentamientu qu'ellí asocedió. El silenciu pesaba nel ambiente, solo atayáu pol tenue murmuriu del vientu que entraba poles ventanes frayaes.

El maestru volvió a entamar la so andadura, traviesando la sala con precuru pa dirixise escontra les escaleres d'accesu a los talleres. Pero xusto cuando s'atopaba debaxo de la gran cúpula, detúvose ablayáu. El so cuerpu respióse mientres la so mente escurecíase coles visiones d'acontecimientos futuros. La so gran sensibilidá a la Fuercia dexó-y perceber la proximidá d'una gran solombra escura que taba a puntu de cruciar l'estragal principal de la sala.

Cuando agüeyó pa la entrada, la escura figura de Anakin Skywalker dibuxábase yá escontra la lluz que s'afilaba pela puerta principal de la Gran Sala.

—¿Aú crees que vas, Gaius?

El mozu Skywalker prendió'l so sable de lluz y avanzó amenazador escontra Gaius. Acompañábanlu un grupu de troopers, que s'espardieron rápido formando un círculu perampliu que arrodio a los dos jedi.

Esta vegada nun había escape pa Gaius. Nun tenía nenguna oportunidá énte tal númberu d'enemigos y entamó a preparase mentalmente pa ser ún cola Fuercia. Sabía qu'en cualesquier momentu cayería baxo los blasters de los clones. Lo que nun diba permitir de nengún mou yera ser axusticiáu por aquel traidor fachendosu.

—iAnakin!, ¿Cómo pudiste facer estu? —declamó Gaius—. ¡Matar mozos indefensos! ¡Va escontra de lo que los jedi representen!

—Síentolo Gaius. Nun puedo seguir col dogma de los jedi —retrucó un tarrecible Anakin—. La Orden ta podre y nun puedes culpame. Tú mesmu dixístelu munches vegaes metanes la pantomima de xuiciu que-y fixeron a la mio padawan, Ashoka Tano.

—Sabes bien del mio fondu despreciu a l'autoridá infalible —contestó Gaius, midiendo les sos pallabres—. Pero'l cambéu tien de algamase al traviés de la cooperación apostao y llibre ente iguales. Enxamás per aciu d'una dictadura, sía'l que quier la so ñatura. Y eso ye precisamente lo que traes contigo.

La tensión ente los dos Jedi yera cada vegada mayor. Al tiempu que ésta medraba, la llibertá na galaxia taba más cerca del abismu. La Orden Jedi llegaba a la so fin.

—Fuí traicionáu polos jedi y pola República —retrucó Anakin—. Nun m'obligues a lluchar contigo. Pensé que lo entenderies. Yes l'únicu jedi al qu'aprecio. L'únicu que defendió'l pensamientu del Conde Dooku énte l'Alto Conceyu Jedi.

—Cometes un grave error, Anakin —retrucó Gaius con cuidáu aselu—. El verdaderu Orde ye l'abolición de la Autoridá. Lo que Dooku proponía yera xustu lo contrario. ¿Qué hai de la to llealtá a la Orde Jedi? ¿Qué ye, que nun significa nada pa ti? ¿Qué crees que vas algamar destruyéndola?

—Confiaba en que xuniéreste a mi pa llimpiar la República —dixo Anakin—. Nun me voi a detener énte nada p'algamalo. Si nun lu faes, nun voi tener otu remedi u que matate. Pero enantes de morrer vas revelame los tos secretos. Quiero tou el to Poder.

—¿Los mis secretos pa cola Fuerzia? —dixo Gaius incrédulo—. ¡Ven por ellos Anakin! —glayó Gaius con sorna mientres prendía'l so sable de lluz y poníase nuna posición defensivu.

Al sentílo, Anakin empecipió l'ataque entamando una danza mortal de rellumos d'enerxía. Conocíu pol so poder y habilidá escepcionales, el mozu jedi amosaba una maestría ensin igual en cada movimientu. Gaius pola so parte, taba en desventaxa. Col so brazu esquierdu mancáu y escosáu pol esfuerciu mental fechu, taba llindáu nos sos movimientu. Magar esta desventaxa, amosábase valiente y decidíu, a la gueta de cualesquier oportunidá pa compensar los ataques del so oponente.

El runfíu de los sables de lluz al topetar enllenaba l'aire y producía un estrañu ecu na Gran Sala. Los jedi movíense con gracia y velocidá, reparaos con atención pol escuadrón de troopers. Anakin aprovechaba la so fuerza y destreza, executando movimientu fluyíos y precisos, tentando de superar a Gaius en cada alcuentru. Por l'otru llau, Gaius movíase con lentitú, pero torgaba con habilidá los ataques d'Anakin.

A pesar de la so tenacidá, Gaius empecipiaba a amosar señales de fatiga y escosamientu. La fuerza y resistencia d'Anakin yeren notables y la so maestría nel combate facíase más evidente. Los ataques d'Anakin yeren más rápidos y contundentes y Gaius lluchaba por caltenerse al altor.

A lo último, Gaius foi superáu. Escosu y mancáu, yá nun podía defendese afechiscamente de los tarrecibles ataques d'Anakin. Nun momentu críticu del duelu, Anakin desarmó a Gaius Dun, aventando el so sable de lluz escontra un requexu de la sala. Skywalker aprovechó l'oportunidá pa garrar con fuerzia al so oponente pol brazu mancáu, causándo-y un dolor intensu que s'arrobinó per tol so

cuerpu. Gaius, próximu al esmorecimientu, glayó con congoxa cayendo postráu al suelu de rodíes dafechaemente indefensu énte'l so oponente.

Pero nun movimientu coraxosu, Gaius decidió que yera hora d'emplegar los sos poderes ocultos.

—Puntu 4: Nun hai pasión, hai serenidá—

Aprovechando'l contactu físicu col so oponente y magar que taba xugando col so caberu aliendu vital, Gaius entró en trance. Los sos güeyos en blancu moviéronse a velocidá vertixinosa, viendo los acontecimientos darréu anteriores al momentu presente. El texíu temporal de la Fuerzia Vivo venceyada a Anakin permitió-y viaxar muncho más llueñe nel pasáu de lo que pudo facerlu cola so padawan. Mientres el so tránsitu, alicó'l momentu nel que Anakin asesinaba a los mozos younglings. Pero esta vegada fíxolo dende'l puntu de vista de Skywalker en llugar del de la so padawan. Reconstruyó cómo'l jedi asesinara a la maestra Shaak Ti. Respóngose al afayar cómo Anakin rindía pleitesía a un Lord Sith, que nun yera otu qu'una versión cruelmente deforme del canceller supremu Sheev Palpatine. Vió cómo Anakin traicionaba al maestru Mace Windu y cómo ésti foi asesináu pol Sith. Pero nel momentu álxidu de comunión mística cola Fuerzia Vivo, Gaius viaxó muncho más llueñe nel pasáu, fasta un planu temporal bien, bien alloñáu...

Agora Gaius conocía tola verdá.

Cuando Anakin Skywalker soltó'l brazu de Gaius Dun, esti esmúcióse lenta y llamentablemente fasta'l suelu, onde quedó tendíu pámpana arriba y totalmente azotáu. Dende la frialdá del pavimentu, los sos güeyos guetaron con una mirada glacial al Sith.

—Punxisti les tos habilidaes al serviciu d'un Sith —murmuró Gaius con un filu de voz.— ¿Cómo pudisti traicionar a la Orde Jedi, Anakin? ¿O quiciabes tendría de empecipiar a llamate... Darth Vader?

Al sentir estes pallabres, un visax de sorpresa dibuxóse na cara d'Anakin. Sólo Palpatine taba ellí cuando xuró llealtá al Sith pol nome de Darth Vader. ¿Cómo yera posible que Gaius Dun lo pescudara? Seique aquellos rumores sobro'l bruxu capaz de leer mentes yeren ciertos. Rescamplaba qu'aquel jedi gris, que taba derrotáu a los sos pies yera enforma peligrosu. Había qu'esanicialo.

Pero enantes tenía qu'arrampuña-y el so mayor poder. Aquel que Gaius escondía con procuru y que yera la razón pola que Skywalker tornara pal templu.

—Asina ye que conoces el mi nuevu nome —retrucó Darth Vader—. Los tos poderes son ablucantes Gaius. Pero yo tamién conozo dalgún de los tos secretos. Aquello que t'acorada dende fai yá dellos años. Vine a pola to fía, Gaius. Quiero que m'apurras a Tisha.

Los güeyos de Gaius dilatáronse de sópitu. Con un doliosu esfuerzu, levantó'l so pechu del suelu y miró al Sith con firmeza.

—Sí, Gaius. La youngling Tisha ye la fía que tuviste en secreto cola maestra Selene Voss —anunció un Vader griespo—. ¿Qué ye, que'l Código Jedi nun prohíbe la paternidá? ¿Qué opinaría'l Alto Conceyu Jedi d'esto?

Gaius entamó a abasnase penosamente pa trás, alloñándose del Sith. Los sos gañíos de dolor al raspiar el suelu coles sos llagues retumbaben na gran cúpula, dando-y a la escena un aire dramáticu al empar que patéticu. El jedi atopábase talmente escosu pol esfuerzu mental qu'emplegara pa interpretar la Fuercia Vivo y movíase con bien de torpeza.

Satisfechu, el Sith disfrutaba el sufrimientu del so oponente. La escena yera siguía pola mirada incrédula de los troopers. Cada ún quitose el cascu de la so armadura pa reparar meyor l'inevitable final del xeneral jedi.

—Va años que sé que fixisti pasar a la to fía como una youngling güérfana pa recibir formación nel templu —dixo un Vader triunfante—. Se que Selene y tú táis protexéndola de callao dende entós. Ye la fía de dos poderosos jedi y la sobrina d'un llexendariu maestru. La Fuercia ye escomanada n'ella y representa un enome peligru pal nuevu Orde. Sabes que tien de ser esaniciada.

Xusto nesi intre, Gaius Dun algamo'l centru mesmu de la Gran Sala. Con dificultá enclicose sobre los sos talones, adoptando la posición tradicional de meditación. Darréu baxó la cabeza sobro'l pechu y zarró los sos güeyos pa entrar en trance otra vuelta.

—Vine a por Tisha —dixo Darth Vader— Pero nun soi a percibir la so fuerte presencia nel templu como n'otres vegaes. Sé que la ocultes Gaius, y vas dicime aú tá.

Darreú, Vader apurrió la so mandrecha escontra'l caedizu jedi y faciendo usu de la so Fuercia Escura, enfusó con crueldá na mente del xeneral, na gueta del paradoriu de Tisha.

Sicasí, Gaius Dun tenía otros planes.

Magar el so estaú de postración y escosamientu, l'intentu de Vader de endosar na so mente malapenes representó un llixeru bloqueu pa Gaius. El so poderosu control mental, frutu de años d'entrenamientu nes artes escures de la Fuercia yera bien superior al del mozu Sith. La griesca taba agora n'un terrén aú Gaius yera l'amo máximu. Cuntando cola ventaya táutica, Gaius decidió pasar a la ofensiva emplegando'l so poder ocultu. Si aínda quedaba dalguna esperanza de redimir la Orde Jedi, el xeneral Gaius nun duldaría en aplicar el poder del Llau Escuro pa algamalo.

—Puntu 5: Nun hai muerte, esiste la Fuercia—

El maestru Qui-Gon Jinn faló-y de la posibilidá de la so existencia, la Gran Madre Talzin amosó-y el camín y a lo último Gaius Dun creó y perfeccionó'l tresvase de Fuercia Vivo estudiando a los Frangawl nel planeta Bardotaa. Dada la so peligrosidá, enxamás emplegó la téunica en combate usando siempres soluciones alternatives. Pero yá nun-y quedaba otra opción. Esta yera la so cabera esperanza.

La posibilidá de morrer nel intentu yera bien grande. Poro tenía d'actuar con gran procuru y atalantar el momentu exautu nel que parar la so aición. Decidió, emplegó la escasa enerxía qu'entá-y quedaba pa aumentar la so concentración. Empecipió entós un procesu d'interacción cola Fuercia Vivo averada, xenerando una reacción en cadena que se multiplicaba en dellos ordes de magnitú cada pocos segundos. La so comunión cola Fuercia arreció integrándose cola redolada d'una manera única. Pa plasmu de toos, el so cuerpu entamó a cimblar de manera xabaz mientes una misteriosa aura verdosa empecipaba a envolubralo.

Amodo, Gaius apurrió'l so puñu derechu na direición de Darth Vader. Una misteriosa ñube de lluz foi disparáu sopitamente pol brazu de Dun escontra'l so oponente, quien foi abasnáu violentamente dellos metros pa tras, estrapallándose escontra una muria pembaxo dun gran ventanal. La lluz alrodiu de Gaius facíase cada vegada más intensa y de secute treslladóse al cuerpu de Vader quien vióse arrodiáu por una intensa ñube verde. Darth

taramellábase a midida qu'unes lluces verdoses arrodiábenlu de forma vertixinosa. Gaius abrió'l so puñu y llevó la mano escontra'l so pechu, non ensin cierta dificultá. De sópitu, una poderosa lluz verde acompañáu d'un gran estrueldu coló de Darth Vader pa enfusar nel cuerpu de Gaius Dun, quien vióse solmenáu con violencia.

El jedi absorbió entós una inxente cantidá de Fuercia Vivo que colaba de Vader, quien de la mesma debilitóse cayendo al suelu. El so cuerpu nun pudo caltener el so pesu y esbarrumbóse p'alantre, evitando dase de focicu nel últimu momentu anteponiendo les sos manes. Gaius sintió cómo'l fluxu de la Fuercia medraba exponencialmente hasta que la so vitalidá taba próxima a algamar la plenitú. El procesu taba yá a un res de descontrolase cuando Gaius llogró paralo, salvando la so vida. La lluz verde sumió sópitamente con un gran estrueldu. Una gran onda esparcedora proyeutóse dende'l centru la sala escontra l'esterior. La enerxía arrobinada refundió a los troopers fuera del edificiu al traviés de los ventanales, que los sos cristales frayaron dafechu pol efeutu del españu. Dellos soldaos estrapalláronse escontra la paré de la sala, quedando esmorecíos.

Tou duró malapenes unos segundos.

El xeneral púnxose de pies con determinación. Señaló col so brazu na direcció na que reposaba'l so sable de lluz y ésti llegó volando pa la so mano por mor de la Fuercia. Avanzó pasu a pasu amodo escontra'l so oponente mientres la so túnica flotaba col oral qu'aportaba del esterior. Con cada pasu, el suelu temblaba so la so presencia amosando la Fuercia que salía d'elli. La so mirada serena y penetrante calteníala fixa nel so rival, dexando ver una profunda conexón cola Fuercia.

El tarrecible Sith aínda taba tumbáu nel suelu. La so pimpana figura, humildada, taramellaba nun baldíu esfuerzu por incorporase. Con dificultá, llogró afitar sobre'l maestru jedi una mirada griespa y cargada de desesperación.

Al aportar a la so vera, el xeneral activó'l so sable de lluz con un movimientu fluú. Una brillante columna de lluz morada surdió de la empuñadura, allumando'l rostru d'ambos con una rellumada cálidu y griespo.

—Tarrezu que nun puedo facete prisioneru, Vader —espetó-y Gaius con burla.

—¿Vas matame, Gaius? —entrugó Vader con rensía.— ¿Qué ye, que pienses vengate?

—¿Tal que tu fixisti col Almirante Trench o col Conde Dooku? Non, Vader. Yo nun soi un asesín —retrucó Gaius Dun con voz firme y fonda.— La vengación nun ye propia de los jedi. Enxamás voi matar a un oponente desarmaú. Sólo quiero que contemples la mio cara allumada pol mi cristal de Kyber. Quiero tar siempre nes tos velees.

Los güeyos del Sith, qu'enantes radiaben ira, amosaben agora un odio infinitu. El so esnalíu solmenao sentíase como un llamento apolmomante mientres tentaba de recuperar l'aliendu. Les manes, qu'unos minutos atrás empuñaron el so sable láser con ferocidá y maña, enferronábense agora'l suelu intentando infructuosamente garrar dalgún sofitu que-y dexara ponese de pies.

El jedi yera conocedor del peligrosu que representaba caltener a Darth Vader vivu. Pero tamién sabía que'l verdaderu poder d'un jedi aniciaba na so voluntá pa defender lo correutu, ensin importar les adversidaes qu'atopara nel so camín, inclusive cuando s'enfrentara a les tentaciones más engañadoras. Sía comoquier, anque se recuperaría, el mozu Sith enxamás algamaría la plenitú del so poder tres el tresvase de Fuercia al que foi sometíu.

—Conozo bien el Llau Escuru. Tuve ellí bien de vegaes —señaló Gaius.— Pero asegúrote qu'ellí nun vas atopar paz nin redención. La Fuercia ye como un ríu que flúi buscando l'equilibriu y va algamarlo dándote un sufrimientu tarrecible. Asemeyáu al que tas causando agora —profetizó'l maestru.

—¿Crees que m'asusta'l dolor? —glayó Vader envueltu nuna roxura gafienta.— Erradiqué toa medrana nel mio camín haza'l poder absolutu. Abracé'l Llau Escuru por escoyeta, non por debilidá. La Escuridá ta dándome poderes inomables y nun me importa pagar el preciu. Nada puede detener el mio destín y ésti ye gobernar la galaxa con puñu de fieru.

—Un verdaderu jedi nun tien de controlar a los demás nin tampoco dexar qu'otros lo controlen —siguió Gaius—. Nun hai nada más despreciable que lo que agora representes. Yes puxarra Vader. ¡Puxarra rebalbo!

Nel intre nel que Vader diba retrucar con rotura, los contendentes percibieron pequeñes vibraciones nel fluxu de la Fuercia, señalando la presencia d'un grupu de clones que taben a un res de cruciar la puerta de la Gran Sala.

Con axilidá y maestría, el jedi realizó un acrobáticu saltu, alzándose sobro'l vanu d'ún de los ventanales. Ellí, adoptó una posición defensiva col so sable de lluz llistu pa la batalla. La figura del jedi retayábase poderosa nel espaciu del ventanu mientes la so túnica flotaba al compás del oral.

Ensin dicir pallabra, los clones empecipiaron a disparar dende l'entrancia. Con movimientos precisos, Gaius reflexó los rayos de los blasters, creando una danza lluminosa y espectacular nel aire. Los clones, sorprendíos pola maña del jedi, recularon momentáneamente pa replantegar la so estratexa. Gaius Dun aprovechó esti curtiu esnalíu pa dirixise por última vegada al Lord Sith.

—El Llau Escuro ye poderosu, pero nun va darte lo que guetes —despidióse el maestru.— Namái vas algamar destrucción y dolor al to pasu. Entá tas a tiempu pa lliberate, Anakin. De siguir per este camín, vas garrar lo que nun poses.

Darréu llanzóse pa trás al traviés de l'enorme abertura del ventanu y con un maxistral cucurrabucu, aterrizó nel exterior del edificiu. De sigió vio'l speeder d'Aric, arrodiáu por un pelotón de soldaos. Al comprobar que yeren l'única amenaza presente na redolada, apagó'l so sable de lluz y colgólu del so cinchu. Corrió entós escontra'l aerodeslizador mientres los troopers salíen-y al so alcuentru. Ensin inmutarse fixo un brengosu xestu escontra ellos cola so mano abierta y los clones salieron despedíos con extrema brutalidá nuna pimpana demostración del poder de la Fuerzia que afluyía pol jedi.

D'un saltu aterrizó nel asientu del acompañante y con teatralidá xiróse al so lleal droide astromecánicu, quien ocupaba l'asientu del conductor.

—Vamos Mix-four, tenemos que visitar unes vieyes conocies nel nivel 1313. Desactiva'l control de velocidá y nun te detengas énte nada.

El vieyu pero fiable RGC-16 de Tarek arrincó a toa velocidá y el droide y el jedi despaecieron na escuridá de la nueche triste de Coruscant.

La Xunta

Gaius Dun analayaba en solitariu ente les escures y peligrosos cais de los niveles más fonderos y deprimentes de Coruscant. Sabía que nesi intre yera ún de los oxetivos cimeros pal exércitu de la República y necesitaba abelugase nun llugar seguru pa despintase.

Caleyaba vistíu con una llarga y puerca capa de material bien basto que furtiara nun sórdidu chigre mientras el so dueñu taba distrayíu con un númberu musical. Aquella indumentaria dexába-y despintar la so túnica jedi a les miraes indiscretas.

Namás aportar al nivel 1313, unvió a M1X-4 a desfacer el speeder de Tarek. Ordenó-y llevalo al taller mecánicu de les hermanes Martez y negociar con elles un bon preciu. Nes sos misiones d'infiltración mientras la guerra, fixera bonos tratos con aquellos piques, ya instruyó convenientemente a Mix-four sobro la forma de axustar con elles. Tenía claro que nun-y pagaríen lo que realmente valía aquel speeder pero al menos algamaría bonos créditos. Diba precisar les perres bien ceo si quería mercar un billete n'algún tresporte que colara del planeta.

Empobinó pa un vieyu bloque d'apartamentos. Nel atopábase una pequeña vivienda qu'usó frecuentemente como tapadoria en misiones d'espionaxe mientras les Guerres Clon. Consiguiera'l local axustando con unos conocíos gangsters del Sindicatu Pyke. Aquellos traficantes yeren xente peligroso. Siempre taben arreyaos n'asuntos turbios de diverso tipo. Sicasí los Pike foron-y bien útiles como confidentes y facilitando tou tipu d'aiciones especiales na clandestinidá. Les xestiones que fixo con ellos permitió a la República caltener aquella rede de delincuentes embaxu control y llonxe de la guerra, o a lo menos llueñe de la influencia del bandu separatista. El tráficu de drogues xeneraba una cantidá tresmanada de dineru que bien podía tresformase n'armes nes manes de los enemigos de la República. Yera meyor tener a los Pyke embaxu control, magar que fora sobornando a los sos cabezaleros.

Dempués d'un gran rodiu pa asegurase de que nun lu siguieren o ser reconoció poles cámares de seguridá, Gaius aportó por fin al apartamentu. Amás de pequeñu y esgonciáu, nun tenía nada de particular. Sacantes de xaciú, les coses jedi que despintaba nel so interior. Escondió detrás de los paneles del dormitorio atopábase un potente sistema de comunicaciones, heriedu de los tiempos nos que

los Pyke usaben'l llugar pa les sos práutiques delictives. El sindicatu ponía gran curiáu n'asegurar que la so rede de comunicaciones pasara dafechu inalertida pa los axentes del orde. Aquel equipu podía establecer tresmisiones codificaes de llargu alcance con práuticamente cualesquier llugar de la galaxa. La codificación emplegada nos sos mensaxes facía que nun pudieren ser lleídos po les autoridaes. Yera xustu lo que quería y la razón cimera pola que escoyera esa base p'abelugase, ente los múltiples allugamientos secretos que la Orde Jedi tenía espardíos pel planeta-ciudad.

Ensin perder un intre, prendió l'equipu de comunicación holográfica y contactó con Selene Voss. La so semeya, tres unos curtios intres, apaeció metanes la pequeña habitación.

—iGaius! ¿Tas bien? —esclamó Selene con gran esmolición— Aporten noticies tarrecibles de Coruscant. Dicen que los jedi tan rebalbos escontra la República. Recibimos el mensaxe d'emergencia del Conceyu Jedi y empobinemos al traviés del hiperespaci u escontra la capital. Piden que tolos jedi alleguemos darréu al templu. ¿Yá tas ellí?

Les pallabres de Selene enllenaron a Gaius Dun de congoxa ya indignación. Percibió rápido la magnitú de la traxedia que s'acurría sobro los supervivientes de la Orde.

—Selene, escúchame con atención —retrucó Gaius faciendo un visible esfuerzu por controlase—. ¡Esi mensaxe ye una trampa! Afayé que'l canceller Palpatine ye en realidá un Sith y ta asumiendo'l control dafechu de la República. Dio un golpe d'Estáu y ordenó destruyir la Orde Jedi. Los troopers asaltaron el templu y mataron a toos los que ellí taben. ¡Aric ta muertu! ¡Kira foi asesinada! ¡Maya tamién morrió! ¡Mace Windu foi asesináu pol mesmu Palpatine! Yo llogré escapar nel últimu intre y tói ocultu.

—Pero entós... ¡el mensaxe d'emergencia del templu ye cosa de los troopers! —cavilgó Selene—. ¡La Orde ta en peligru!

—Tarrezu qu'asina ye —contestó Gaius—. ¡Habéis de tornar pa la academia del planeta Stewjon darreú! Agora ellí nun hai destacamentos del exércitu de la República. Vais tar a salvo un tiempu. Tiés que despintar a Tisha y a los demás guah.es nun llugar seguru hasta poder aconceyar.

—iGaius, los younglings yá nun tán conmigo! —retrucó Selene ablayada—. El grupin qu'entrenaba en Stewjon foi escoyíu pa la

Xunta Jedi. Colaron hai dellos díes pal planeta Illum al mando de Jaden Korr. Esperaba la to vuelta pa date la gran noticia. ¡Tisha ta con ellos!

La Xunta Jedi ye'l ritu d'iniciación cimeru na vida dun jedi. Tien como oxetivu que los mozos aprendices amuesen la so valía y conexón cola Fuercia. La cova de los cristales del planeta Illum ye un llugar sagráu y místicu, conocíu por allugar una amplia variedá de cristales de Kyber. Estos son la base pa construyir sables de lluz, siendo la fonte de la so poderosa enerxía y del color de la so fueya. El jedi responsable de la Xunta empón a los younglings al traviés de los peligros y desafíos de la cova. De forma individual, cada mozu encara distintes pruebes emocionales y físiques onde tien de superar los sos mios. Cada youngling tien de sintonizar cola Fuercia y confiar na so intuición pa atopar el cristal que resuena cola so enerxía única. Al atopar el cristal fayadizu, tien de amosar el so respetu y reverencia sacándolo curioso del so allugamientu.

Cuando los younglings llogren los sos cristales de Kyber, tornen pal templu jedi en Coruscant nel venerable cruceru d'entrenamientu Crisol. La tradición diz que'l maestru droide Huyang va depender pel camín a los futuros Jedis a construyir el so primer sable de lluz. Cada mozu aprendíz va diseñar y montar la so propia arma, usando'l cristal escoyíu.

—Aparte del caballeru Jaden Korr, ¿daquién más taba con ellos?
—entrugó Gaius.

—Como ye tradición, viaxaben col droide Huyang —sospiró Selene.— Pero esta vegada la nave vieno de Coruscant con un pelotón de soldaos d'asalto como escolta.

Gaius Dun zarró los güeyos con angustia.

—Que la Fuercia te acompañe, mío queridísima Tisha —papuxó'l xeneral.

Tisha

La corbeta Crisol, clase Paladin, cruceru d'entrenamientu y vehículu destináu pal ritual de la Xunta Jedi dende los tiempos de l'Antigua República viaxaba escontra Coruscant superando la velocidá de la lluz. Na aparente tranquilidad del hiperespaciu, taba

desendolcándose una de les cróniques más murnies de la fin de la Orde Jedi.

Emplegando los sos nuevos sables de lluz, los younglings nun teníen otra opción qu'enfrentase nuna engarradiella suicida y dafechamente desigual escontra un grupu de soldaos profesionales enfotaos n'executar la Orde 66.

Lideraos pol caballeru jedi Jaden Korr, los guah.es llograron defendese con valentía y determinación, abellugáos nel hangar de talleres de la Crisol. Pese a la so mocedá ya inesperiencia, los younglings llucharon con heroica entereza. Usando los sos sables de lluz con maña, bloquiaron los disparos de blaster contraatacando con movimientos axilosos y precisos, causando incluso delles baxes al enemigu.

Sicasí nun se fixeron munches ilusiones. Sabíen que'l final taba cerca y dalgunos preparáronse pa ser unu cola Fuercia. El primeru en cayer foi'l so líder. Muertu Jaden Korr, la resistencia esbarrumbose y el grupin dixebróse. Cada neñu busco la so salvación pola so cuenta afuxiendo en distintes direiciones. Agora yeren blancu fácil pa los afayadizos disparos de los troopers.

En metá del tracamundiu, el droide Huyang, collaciu lleal de los younglings, algamó intervenir y tomar el control de la vieya nave. Nun momentu d'oportunidá, fixo que la nave dexase'l hiperespaciu pa desacelerar a velocidá sublluz, asitiándose sópitamente na órbita d'un planeta afaráu y desérticu.

Aprovechando'l caos, la única youngling superviviente afuxía corriendo a toa velocidá per un llargo corredor. La rapacina Tisha tenía la esperanza d'axuntase con Huyang na proba de la nave y aprovechar el blindaxe de la cabina p'afitar un puntu fuerte nel que defendese hasta que aportara ayuda. Nes sos manes portaba dos sables de lluz. Ún de lluz azul y otu de lluz blanco. Pa plasmu de toos, la neña foi la única youngling que sintonizó la so Fuercia con dos cristales de Kyber distintos. Un fechu únicu que nun pasó desapercibíu pa Korr nin pa Huyang.

En metá de la carrera, abrióse sópitamente una escotílla nel techu del corredor y per ella cayó un trabáu soldáu d'asaltu. Cola velocidá que llevaba, a la neña nun-y dio tiempu pa detenese, nin tampoco pa prender los sos sables de lluz pa defendese. Cuando'l trooper iba a disparar col so blaster, Tisha namái pudo poner instintivamente los

soos brazos per delante pa protexese mientres seguía corriendo. Pa la so sorpresa, sintió un estremecimientu en tou el so cuerpu y coles mesmes vió al trooper volar pel corredor, estrapallándose con fuerza escontra duna de les escotilles d'accesu. Mientres la so recién formación nel planeta Stewjon, Tisha viera munches vegaes a la so maestra Selene exercer la Fuercia sobre dellos oxetos. Pero esta foi la primer vegada que Tisha algamábalo. ¡Y fíxolo d'una forma bien contundente!

Esmolecida énte la apaición de más tropes, Tisha decidió escondése nuna de les numberoses cáusules de salvamentu de la nave, les cuales taben alliniaes al llau del llargu corredor. Un vegada zarrada y asegurada la escotilla, pudo ver al traviés de la ventana de la cáusula que yá nun viaxaben pel hiperespaciu. Atopábanse sicasí na órbita d'un estrañu planeta marrón qu'amosaba una aparente falta de vida y de vexetación.

Col peligrosu tan cerca, Tisha nun vió otra opción que llanzase a l'aventura, abandonando la corbeta na cáusula d'escapada.

Pocu dempués del llanzamientu, la pequeña nave esmúcióse selemente al traviés de l'atmósfera del desconocíu planeta, dexando un cercu de povisa llvantáu pol aire. Foi baxando metanes del planeta desérticu, anidiando la so trayectoria con retrocohetes pa un aterrizaxe seguru. Mientres s'averaba a la superficie, Tisha pudo reparar nel secanu y la estensión ensin fin d'un paisax afarao.

Tres dun sópitu aterrizaxe nel suelu arenosu, la moza esperó pacientemente a que la ñube de particules de sable quitárase del aire enantes d'abrir la escotilla. Alrodiu esparcíase un terrén con dunes que s'alzaben nuna suave curva. Nun había señales evidentes de vexetación o agua, namái una paleta de color dorau y brillosu que llegaba hasta onde algamaba la vista. L'apparente falta de vida creaba una sensación de soledá y silenciu.

Pero lo que más llamó l'atención de Tisha yeren los dos soles qu'empecipiaben a despintase nel horizonte. La so lluz penerábase al traviés del polvu, creando una increíble gama de colores brillosos que facíen que tou'l paisax paeciera envolubráu nuna rellumada máxico.

Mientres la nueche cayía sobro'l planeta, Tisha seguía mirando'l cielu, reparando que bien llueu vendríen nuevos desafíos y aventures. Nesi momentu, nel mediu del desiertu y cola so mirada nos dos soles, la pequeña jedi sentíase enllena de determinación y enfotu nel so camín per delante.